

दिनांक : 25.02.2026

समय : 18.45 बजे

- राज्य कैबिनेट री मंजूरी पाछे अब दो ऊं बत्ता टाबर-टाबरियां वाळा ई पंचायत अर नगरपालिका चुनाव लड़ सकेला ।
- राष्ट्रपति द्रौपदी मुर्मू देश रा विकास मांय जनता ने सेहत ने खास बताई ।
- राज्य सरकार प्रदेश ऊं विलायती बबूल खत्म करण सारू खास अभियान चलावेला ।
- होलाष्टक सरू व्हेवण सारू प्रदेश मांय फागोत्सव रो धमाल सरू व्हयो ।

000

राज्य मंत्रिमंडल री खास मीटिंग आज जयपुर मांय व्ही । मुख्यमंत्री भजनलाल शर्मा री सदरत मांय व्ही मीटिंग मांय पंचायती राज, औद्योगिक विकास अर प्रशासनिक सुधारां ऊं जुड्या केई फैसला करी ज्या । मंत्रिमंडल राजस्थान पंचायती राज संशोधन बिल 2026 अर राजस्थान नगरपालिका संशोधन बिल 2026 रा मजमून ने मंजूरी दे दीनी । संसदीय कार्य मंत्री जोगाराम पटेल बतायो के अब दो ऊं बत्ता बाळक व्हेवण परां ई उम्मीदवार स्थानीय निकाय अर पंचायती राज संस्थावां रा चुनाव लड़ सकेला । श्री पटेल बतायो के सुप्रीम कोर्ट रा हुकम री पालना मांय अब कोढ री बीमारी रे कारण चुनाव नी लड़ सकबा री शर्त खत्म कर दीरीजी है ।

.....

उपमुख्यमंत्री डॉ. प्रेमचंद बैरवा बतायो के सरकार अजमेर मांय 'राजस्थान आयुर्वेद, योग अर प्राकृतिक चिकित्सा विश्वविद्यालय' खोलण रो फैसलो कीनो है । वे कह्यो के जोधपुर पाछे ओ प्रदेश रो दूजो आयुर्वेद विश्वविद्यालय व्हेला, जिण ऊं शोध अर मेडिकल टूरिज्म ने बधावो मिलेला । सरकार माली अपराधां माथे लगाम लगावण सारू 'राजस्व सूचना एवं आर्थिक अपराध निदेशालय' बणावण री मंजूरी ई दीनी है । इण रो हैडक्वार्टर जयपुर मांय व्हेला अर ओ पूरा प्रदेश मांय काम करेला । ओ निदेशालय मकान, दुकान, जमीन री खरीद-फरोख्त मांय धोखाधड़ी, बैंक-बीमा ठगी अर फर्जी कागजात ऊं जुड़ी शिकायतां री जांच करेला । ई सारू 107 नुवा ओहदा ई बणायी ज्या है । राज्य मांय औद्योगिक निवेश बधावण सारू ई 'राजस्थान इंडस्ट्रियल पार्क प्रमोशन पॉलिसी 2026' ने मंजूरी दीरीजी है । उद्योग मंत्री कर्नल राज्यवर्धन सिंह राठौड़ बतायो के गैर-सरकारी निवेशकां ने औद्योगिक पार्क विकसित करण सारू निवेश माथे 20 फीसदी ताई कैपिटल सब्सिडी दी जावेला । कर्नल राठौड़ बतायो के मंत्रिमंडल जयपुर मांय बी-2 बायपास कने बणाया जावण वाळा कन्वेंशन सेंटर 'मंडपम' रा नुवा मॉडल ने ई मंजूरी दे दीनी ।

.....

आज री मीटिंग मांय ग्राम विकास अधिकारियां री तरक्की रा मौका बधावण सारू सहायक ब्लॉक विकास अधिकारी रा साढे 700 नुवा ओहदा मंजूर करी ज्या ।

000

राष्ट्रपति द्रौपदी मुर्मू कह्यो है के स्वस्थ नागरिक देश ने स्वस्थ बणावण मांय खास काम करे है । वे आज महाराष्ट्र रा बुलढाणा ज़िला रा शेगांव मांय राष्ट्रीय आरोग्य मेळा रा उद्घाटन जळसा मांय बोल रही ही । राष्ट्रपति कह्यो के दवाइयां रा गुण वाळा पौधां री खेती ऊं किसानां री माली हालत मांय सुधार व्हेवण सागे मिट्टी री गुणवत्ता ई बधे है । ई मौके राष्ट्रपति कह्यो के ओ आरोग्य मेळो आयुष रा प्रति जनता मांय जाग जगावण रो खास मंच है ।

.....

राष्ट्रीय आरोग्य मेळा मांय जनता ने आयुर्वेद, योग अर प्राकृतिक चिकित्सा, यूनानी, सिद्ध, सोव-रिग्पा अर होम्योपैथी रा तरीकां ऊं जुड़ी मुफ्त राय, स्वास्थ्य जांच अर दवाइयां दी जावेला ।

000

सुप्रीम कोर्ट एन.सी.ई.आर.टी. री 8वीं कक्षा री किताब मांय न्यायपालिका मांय कथित भ्रष्टाचार रो जिकर माथे खुद संज्ञान लीनो है । मुख्य न्यायाधीश न्यायमूर्ति सूर्यकांत, न्यायमूर्ति जॉयमाल्य बागची अर

न्यायमूर्ति विपुल एम. पंचोली री खंडपीठ इण ने गंभीर चिंता रो मुद्दो बतायो। वकील कपिल सिब्ल अदालत मांय कह्यो के 8वीं कक्षा रा बच्चों ने न्यायपालिका मांय भ्रष्टाचार रा बारा मांय पढ़ावणो घणी चिंता री बात है। न्यायमूर्ति बागची कह्यो के आ संविधान री मूल बणावण रे खिलाफ निज़र आ रही है। खंडपीठ कह्यो के किण ई ने न्यायपालिका री छवि धूमिल करण री मंजूरी नी दी जावेला। ध्यानजोग है के आठवीं कक्षा री सामाजिक विज्ञान री नुवी किताब मांय भ्रष्टाचार, मोटी तादाद मांय चाल रह्या मामलां अर न्यायाधीशां री कमी ने न्यायिक प्रणाली री चुनौतियां रा तौर ऊं बतायी ज्या है।

000

केन्द्रीय कृषि अर किसान कल्याण मंत्री शिवराज सिंह चौहान कह्यो है के सरकार खाद री उपलब्धता बधावण सागे कीड़ा मारण री नकली दवाइयां री बिक्री माथे आंकश लगा रही है। वे आज नई दिल्ली मांय पूसा कृषि विज्ञान मेळा रा उद्घाटन जळसा मांय बोल रह्या हा। श्री चौहान कह्यो के किसानां ने कर्ज मुहैया करावण सारु बेगा ई किसान पहचान पत्र जारी कर्या जावेला। ई मौके श्री चौहान ए. आई. ऊं चलाया जावण वाळा बहुभाषी डिजिटल प्लेटफॉर्म भारत विस्तार रा बारा मांय जाणकारी दीनी।

000

पंचायती राज अर शिक्षा मंत्री मदन दिलावर कह्यो है के राज्य मांय विलायती बबूल ने खत्म करण सारु खास अभियान चलायो जावेला। श्री दिलावर आज विधानसभा मांय विधायक लादूराम पितलिया कानी ऊं उठायी ज्या मुद्दा माथे आ जाणकारी दीनी। मंत्री बतायो के विलायती बबूल रोजीना 30 लीटर पाणी पीवे है, जिण ऊं राज्य मांय पाणी री कमी व्हेवण सागे करीब 500 भांत री स्थानीय वनस्पति खत्म व्हेवण रा कगार माथे पूग गयी है। दिलावर बतायो के पंचायती राज विभाग इण ने हटावण री कार्ययोजना माथे विचार कर रह्यो है।

000

अजमेर मांय आनासागर झील ऊं मलवो हटावण रो काम बेगो ई सरु कर्यो जावेला। इण रा काम री योजना बणावण सारु अजमेर रा संभागीय आयुक्त सगळा संबंधित महकमां रा अहलकारां सागे मीटिंग कर र एक सप्ताह मांय रपट सरकार ने सूपेला।

नगरीय विकास मंत्री झाबर सिंह खर्चा आज विधानसभा मांय ई बारा मांय विधायक चंद्रभान सिंह चौहान री ओर ऊं लायी ज्या ध्यानाकर्षण प्रस्ताव रा जवाब मांय आ जाणकारी दीनी। नगरीय विकास मंत्री कह्यो के सुप्रीम कोर्ट रा हुकम रे मुजब वठे मलवो हटावण रो काम कर्यो जावणो है अर ई सारु सरकार बजट मांय ई प्रावधान कर चुकी है। वे कह्यो के ई काम सारु बेगी ई प्रशासनिक अर माली मंजूरी जारी करी जावेला। स्पीकर वासुदेव देवनानी ई सरकार ने ई काम माथे खास ध्यान देवण सारु कह्यो। इण ऊं पैली श्री चौहान आनासागर झील रा पेटा मांय रेत भर जावण रे कारण लारला दो साल ऊं चौमासा मांय झील रो पाणी सड़कां माथे आ गयो अर केई नीचला हलकां मांय पाणी भर गयो। चन्द्रभान सिंह कह्यो के अदालत रा हुकम रे बावजूद मलवो हटावण रो काम पूरो नी करी ज्यो है।

000

प्रदेश मांय मुख्यमंत्री मंगला पशु बीमा योजना लागू करण रा मामला मांय सर्वाईमाधोपुर ज़िलो अब्बल रह्यो है। पशुपालन विभाग रे मुजब ज़िला मांय हाल ताई 15 हजार 800 ऊं बत्ता दुधारू अर दूजा जिनावरां मुफ्त बीमो करा दियो ज्यो है। ई पहल ऊं 7 हजार 494 पशुपालकां ने माली फायदो मिल्यो है।

000

होलाष्टक री सरुआत सागे ही प्रदेश मांय होळी री सांस्कृतिक अर धार्मिक रंगत निजर आवण लागी है। पाली ज़िला रा रूपावस, घेनड़ी, पिलोवनी, वणदार अर रूगड़ी गांवां मांय चंग री थाप माथे गेर नाच सरु व्हे ग्या है। गांवाई हलकां मांय लोक गीतां बीचे उमाव रो माहौल है। भरतपुर समेत पूरा ब्रज हलका मांय होळी रो धमाल सरु व्हे गयो है। मिन्दरां मांय फाग रा गीतां सागे अबीर—गुलाल री महक आवण लागी है। म्हाणा भरतपुर खबरनवीस बतायो के वठे रा खाटूश्याम मिन्दर मांय आज पांच दिन रो फागोत्सव सरु व्ह्यो।

000

44वीं रेंज स्तर री पुलिस खेलकूद होड़ काल पाली मांय सरू व्हेला । अतिरिक्त पुलिस अधीक्षक नरेन्द्र सिंह देवड़ा आ जाणकारी दीनी । वे बतायो के होड़ मांय जोधपुर संभाग री 12 टीमां रा 500 खिलाड़ी खेलेला । पुलिस खेलकूद होड़ मांय पुरुष अर महिला वर्गां सारू कबड्डी, फुटबॉल, कुश्ती अर निशानेबाजी समेत न्यारा-न्यारा खेल व्हेला ।

000

रेल मंत्रालय सिरोही ज़िला रा आबूरोड़ रेलवे टेशन ने अमृत भारत स्टेशन योजना रा तैत और बेहतर बणावण सारू साढे 81 करोड़ रूप्या मंजूर कीना है । ई रकम ऊं टेशन माथे बणाई-चुणाई रा नुवा काम, डिजाइन, इण ने और रूपाळो बणावण अर पर्यावरण अनुकूल सुबीता विकसित करण ऊं जुड्या काम कराया जावेला ।

000

प्रदेश मांय टाबर-टाबरियां रा ब्याह री रोकथाम अर जागरूकता सारू खास अभियान चलायो जा रह्यो है । ई रा तैत सवाईमाधोपुर मांय जिला विधिक सेवा प्राधिकरण री ओर ऊं कार्यशाला राख्यी ज्यी । इण मांय बाल विवाह प्रतिषेध कानून-2006, पॉक्सो कानून अर आशा योजना रा प्रावधानां री जाणकारी दीरीजी । कार्यशाला मांय अहलकार अर आंगनबाड़ी कार्यकर्तावां ने बाळपणा मांय ब्याह रोकण सारू बणायी ज्यी इकाइयां अर हेल्पलाइन नंबरं री जाणकारी दीरीजी । नागौर मांय ज़िला कलेक्टर चम्पालाल जीनगर कलेक्ट्रेट परिसर ऊं 'बाल विवाह मुक्ति रथ' ने हरी झंडी बता र रवाना कीनो ।

000